



**TUZLA** Suđenje Bahiru Imamoviću, pomoćniku ministra u Vladi TK

# Ucjenom tražio stipendiju za sina, novac i automobil

Nudio nam je i da dignemo kredit kako bismo mu predali 30.000 KM ili da mu kupimo novi automobil Škoda Octavia, rekao Velagić

U Općinskom sudu Tuzla jučer je nastavljeno suđenje Bahiru Imamoviću, pomoćniku ministra u Ministarstvu industrije, energije i rudarstva TK, koji je optužen za krivično djelo primanja dara i drugih oblika koristi.

Imamovića je zbog koruptivnog djelovanja istražiteljima SIPA-e i Tužiteljstvu BiH prijavio zamjenik direktora preduzeća "Tuzla-kvarc" Zlatan Velagić, koji je jučer u Općinskom sudu Tuzla saslušan kao svjedok optužbe.

## Bez dozvole

Velagić je naveo da je "Tuzla-kvarc" imao koncesionu dozvolu 2005.-2010. godine te da su resornom ministarstvu predali zahtjev za njeno produženje. No, taj je postupak, prema riječima Velagića, pomoćnik ministra Bahir Imamović raz-



Imamović s advokatom: Tražio mito

vlačio i otezao unedogled tako da oni, faktički, dozvolu nikada nisu ni dobili.

- Sastanci u četiri oka s Bahirom Imamovićem uglavnom su se svodili na uspostavu koruptivnog odnosa između njega i preduzeća "Tuzla-kvarc". Najpri-

je je tražio da stipendiramo njegovog sina, mjesečno po 1.000 KM, na šta nismo pristali - rekao je Velagić.

Uprkos zaključcima Vlade TK iz 2012. i 2014. godine, Imamović je i dalje rastezao postupak obnove koncesione dozvole.

U daljnjim razgovorima, navodi Velagić, optuženi Imamović sugerirao je da mu "Tuzla-kvarc" treba uplatiti 30.000 KM kako bi on "pogurao" postupak dobivanja koncesione dozvole.

## Koverta s novcem

Svjedok Velagić rekao je da je u Imamovićevom uredu vidio vlasnika kamenoloma u Stuparima, izvjesnog Šugu, koji je Imamoviću predao plavu kovertu s novcem.

- Nudio nam je i da dignemo kredit kako bismo mu predali 30.000 KM ili da mu kupimo novi automobil Škoda Octavia. Bio je i fleksibilan, jer nam je omogućavao da mu tih 30.000 KM možemo uplatiti i u ratama - naveo je Velagić.

U aprilu 2015. godine, Velagić je prijavio Imamovića, koji je uhapšen u akciji SIPA-e 7. maja.

E. Sk.